



Communicazun allas medias digl cumegn da Surses (nr. 02-2022)

Surses: gleisch verda per igl project dalla Nova Fundaziun Origen agls Mulegns

Igl suveran ò accepto la revisiun parziala dalla planisaziun locala «zona da cultura ed alloschamaint Mulegns». Uscheia è igl project cultural dalla Nova Fundaziun Origen agls Mulegns tgi prevei tranter oter la construcziun d'ena tor da 30 m otezza en zap pi manevel alla realisaziun. Ultra da chegl ò la radunanza communal fixo igl li per la construcziun digl luvratori communal nov e concedia en credit dad 1.4 miu. francs per sanar e transfurmar la tgesa da scola a Bivio. Igl project per realisar plazzas da sport ed en nov bietg da gastronomia e menaschi a Savognin ò igl suveran accepto e delibero per mangs digl cumegn d'urna.

Cun clera maiortad ò la radunanza communal accepto la revisiun parziala dalla planisaziun locala "zona da cultura ed alloschamaint Mulegns". Cun chella revisiun vignan stgaffeidas las premissas da planisaziun digl territori per pudeir realisar igl project dalla Nova Fundaziun Origen. Igl project prevei da far reveiver la vischnanca digls Mulegns cun porscher diversas activitads culturalas. Planiso ègl tranter oter da renovar igl "Posthotel Löwe" e d'installar en museum tematic davart igl viagier. Ultra da chegl ègl er previa da construeir ena tor, ena "tor digls pastiziers". Chella tor ò en'otezza da prest 30 meters e vign realisada an collaboraziun cun la Scola politecnica federala Turitg SPF/ETH. La construcziun vign fatga cun elemaints stampos da moda tridimensiunala, e vign an chel senn ad esser unica segl mond. Cun la tor pigls Mulegns preschainta la SPF/ETH Turitg en project tgi metta novs standards cun sia estetica unica, sia moda da biagier modulara e cun igl sies chito dallas resursas. Per Origen sa dattan cun la tor salv supplementars per realisar occurrenzas pi pitschnas. Tar la tor sa tractigl d'en bietg temporar tgi stò neir sbuo siva 5 onns, tenor prescripziuns dalla revisiun parziala.

Siva la decisiun dalla radunanza communal succeda las proximas emdas l'exposiziun publica da recurs davart la revisiun parziala e siva ò la regenza grischuna d'approvar chella revisiun. Schi tot vo scu planiso pò l'approvaziun neir spitgeida aint igl decurs da chesta premaveira.

La suprastanza communal benevainta igl project dalla Nova Fundaziun Origen percheigl tgi cun chel vign stgaffeida ena purscheida culturala da muntada surregiunala, tgi sa drezza ad en segmaint da visitaders supplementar. Cun igl project vign rinforzada er la purscheida culturala gio etableida aint igl cumegn da Surses.

Project "plazzas da sport La Nars a Savognin"

Igl suveran ò accepto cun angal 2 cuntervouchs igl project per ena piazza da sport cumbinada a Savognin, damanevel digl paradis da skis per unfants existent. Igl project cumpeggia treis novas plazzas da tennis ed ena patinera artificziala da 25 m*56 m per eir cun patinas, dar a curling, tschoccas e hockey. Chella patinera vign fatga igl anvien sen las plazzas da tennis. Ultra da chegl vign biagia en nov bietg da gastronomia e da menaschi. Igl tgamon actual dalla Scola per sports d'anviern Savognin, tgi ò sarvia igls davos onns scu ustareia, vign sbuo u ampruo da vender per l'utilisaziun an en oter li.

Igls costs per realisar chel project montan a 4.5 miu. francs. Igl davos pled an tgapel ò ossa igl cumegn d'urna Surses. Igl meis da mars on las votantas ed igls votants da Surses da votar all'urna davart l'approvaziun digl credit. Sch'igl cumegn d'urna dat gleisch verda, pò l'amprema etappa digl project neir realisada sen igl anvien 2022/23.

Cunter scu nov li per igl luvratori communal

Igl suveran ò gia da decider noua tg'igl cumegn duess biagier igl nov luvratori communal. An discussiun èn stadas treis variantas. Ancunter la proposta dalla suprastanza ò la radunanza communal decidia da planisar igl luvratori communal a Cunter, segl areal digl luvratori "vonbueren – restaurieren". Igl titular dall'interpresa vign pensiuno ed ò nign successour, uscheia tgi l'immobiglia è vanala. La suprastanza ò ossa d'elaborar igl project da detagl, tgi ò da neir sottamess alla radunanza communal e siva agl cumegn d'urna per approvaziun.

La proposta dalla suprastanza communal da biagier igl luvratori communal a Savognin, damanevel dalla deponia Davos Fallung, ò igl suveran nego. Er l'oter li sen ena parcella digl cumegn dafora la zona d'industrieia a Cunter ò igl suveran refuso.

Siva dalla fusiun digl cumegn da Surses igl 2016 sa catta igl luvratori communal ainten las localitads digl bietg polivalent a Savognin. Chel plaz vign ossa duvro per igl basigns dalla nova tgesa da scola primara tg'igl cumegn ò per mangs da planisar. Igl è damai necessari da biagier en luvratori communal nov an en oter li.

Credit per sanar e transfurmar la tgesa da scola a Bivio

La radunanza communal ò concedia igl credit brut dad 1.4 miu. francs per sanar e transfurmar l'antieroura tgesa da scola a Bivio an en local da pumpiers ed ena sala polivalenta. La tgesa da scola vign siva digl onn da scola 2018/19 betg ple duvrada cuncheigl tgi igl travagl da scola è centraliso a Savognin. Igl bietg duess ossa neir duvro scu li d'inscunter per las uniuns e scu local per igls pumpiers. Cun angrondaneir igl local da pumpiers pò er neir schliia igl magasign da pumpiers existent a Marmorera.

Ulteriouras infurmaziuns dat igl mastral Leo Thomann (mobile 079 405 96 73)

Tinizong, 8 da favrer 2022